

NAMMINERSORLUTIK OQARTUSSAT



AATSITASSANUT IMMIKKOORTORTAQARFIK

Kalaallit Nunaanni aatsitassarsiornermi ingerlatat 2025

Ingerlatat nassuiaataat



Quppersagaq:

Kalaallit Nunaanni aatsitassarsiornermi ingerlatat 2025 – ingerlatat nassuiarneqarnerat
Allanneqarpoq juli 2025.

Saqqaaani asseq:

Greenland Anorthosite Mining ApS-ip ingerlatseqatigiiffiup pisinnaatitsissuteqarfiani
aatsitassarsiorluni misissuinermi suliaqarneq. Asseq ingerlatseqatigiiffimmit akuerineqartumik
taassuma nittartagaaniit atorneqarpoq: <https://gam.gl/media/>

**Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisoqarfik**

Teknikkinut Nakkutilliinermullu Immikkoortortaqarfik
mlsa@nanoq.gl

Imaneq 1A (Nuuk Center)

Postboks 1601

3900 Nuuk

Kalaallit Nunaat

Oqarasuaat: +299 34 68 00

Nittartagaq: www.govmin.gl

Imai

Aallaqqaasiut.....	6
Aatsitassarsiornermi misissuinnissamut kiisalu piiannissamut akuersissutinut nunap assinga (juli 2025)	8
2025-mi ornigulluni ingerlatassanut pilersaarutigineqartunut takussutissiaq.....	9
Avannaata Kommunia.....	11
MPL 2024-100 & MEL 2025-32: Xploration Services Greenland A/S	11
MEL 2017-26: Zawar Greenland ApS.....	12
Kommune Qeqertalik aamma Qeqqata Kommunia	13
MEL 2011-54: Premium Nickel Resources Ltd	13
Kommuneqarfik Sermersooq	14
MEL 2021-56: Hudson Resources Inc.....	14
MEL 2024-01: Itinnera Solution ApS.....	15
2025-62: Itinnera Solutions ApS.....	17
MPL 2023-119: Itinnera Solutions ApS	17
MPL 2022-77: Nalunaq A/S	18
MEL 2025-40: Vision Geology AB.....	18
MPL 2024-100: Xploration Services Greenland A/S	19
MEL 2024-67: Xploration Services Greenland A/S	19
MEL 2025-01: Skyfire Ltd	20
Kommune Kujalleq	22
MEL 2020-31: Gardaq ApS.....	22
MEL 2020-41: Gardaq ApS,.....	23
MEL 2021-02: Gardaq ApS.....	23
MEL 2023-69: Gardaq ApS.....	23
MEL 2023-70: Gardaq ApS.....	23
MEL 2025-17: Gardaq ApS.....	24
MEL 2010-02: Greenland Minerals A/S.....	24
MEL 2013-06: Greenroc Graphite Limited	24
MEL 2022-03: Greenroc Graphite Limited	25
MEL 2025-125: Greenroc Graphite Limited	25

MEL 2015-17: Nalunaq A/S	25
MEL 2006-10: Nalunaq A/S	26
MEL 2020-36: Nalunaq A/S	26
MEL 2022-08: Nalunaq A/S	26
MEL 2024-62: Nalunaq A/S	27
MIN 2020-54: Tanbreez Mining Greenland A/S	27
Kommunit aggornerisa avataanni	28
MPL 2024-100: Xploration Services Greenland A/S	28
Nunap sannaanut suliassat	29
CO ₂ -nik unerartitsineq toqqorsisarnerlu: Qeqertarsuarmi misissuinerit ingerlaannarput	29
Mingutsitsinngitsumut allanngoriartortitsinermut Kalaallit Nunaanniittut aatsitassat	30
Qaqqat sisoornerannut suliniutit	31
Ilisimatuussutsikkut misissuinerit	33
Nunami aatsitassarsiorluni misissuinerinik suliaqarnerit pillugit paasissutissanut tunngaviusut	42
Asimi ingerlatat suussusaat	42
Attaveqarfissanut paasissutissat	46
5.1 Teknikkinut Nakkutilliinermullu Immikkoortortaqaarfik	46
5.2 EAMRA	46
5.3 Pinngortitamut Avatangiisinullu Naalakkersuisoqaarfik	47
5.4 Pinngortitaleriffik (GN)	47
5.5 De Nationale Geologiske Undersøgelser for Danmark og Grønland (GEUS)	47
5.6 Aalisarnermut, Piniarnermut, Nunalerinermut Imminullu Pilersornermut Naalakkersuisoqaarfik	48
5.7 Nunatta Katersugaasivia Allagaateqaarfialu	48
5.8 Avannaata Kommunia	48
5.9 Arktisk Kommando	48
5.10 Kalaallit Nunaanni Politiit	49
5.11 Kommune Qeqertalik	49
5.12 Qeqqata Kommunia	49
5.13 Kommuneqaarfik Sermersooq	49
5.14 Kommune Kujalleq	49

Appendix 1: Kalaallit Nunaanni kommunit killeqarfii	50
---	----

Aallaqqaasiut

Quppersakkami matumani 2025-mi piffissami asimi suliaqarfiusussami Kalaallit Nunaanni aatsitassanut tunngasunik suliaqarnerit pilersaarutigineqartut nassuiarneqarput aammalu Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup ataani Teknikkinut Nakkutilliinermullu Immikkoortortaqarfimmit suliarineqarluni.

Ornigulluni ingerlatassat pilersaarutigineqartut nalinginnaasumik aasaanerani ingerlanneqartarput. Ingerlatseqatigiiffinnit aatsitassarsiorlutik misissuisartunit ilisimatusarfinniillu assigiinngitsunit qinnuteqaatit, ingerlatassanik piffissami ornigulluni suliaqarfiusussami ingerlanneqartussatut eqqarsaatigineqartunik nassuiaatitallit, upernaakkut aasallu ingerlanerani Teknikkinut Nakkutilliinermullu Immikkoortortaqarfiup tiguserpai. Taamaalilluni ingerlatseqatigiiffiit aatsitassarsiorlutik misissuisartut aamma misissueqqaarnernik suliaqartartut piffissami suliaqarfiusussami ornigullutik ingerlatassat, ilisimatuussutsikkut misissuinissaat aammalu nunap sannaannut nunap assiliornissaat pillugit ingerlatassanut qinnuteqaatini paasissutissat quppersakkami aallaavigineqarput.

Kalaallit Nunaanni aatsitassarsiorluni misissuinissamut soqutiginninneq suli annertuvoq, matumani maajip qaammataani akuersissutit 87-init amerlanerullutik, aatsitassarsiorluni misissuinissamut 65-inut, misissueqqarnissamut 14-inut aammalu piiaanissamut pisinnaatitsissutitut 8-nut agguarsimallutik. Tassunga tunngatillugu oqaatigineqarsinnaavoq ukioq manna pisinnaatitsissutini ingerlatassanut akuersissuteqarnerit 41-t tunniunneqarsimammata.

Ornigulluni ingerlatassat matuma siuliani taaneqartut saniatigut quppersagaq aamma piiaanissamut akuersissutitut ingerlasunut paasissutissanik killiffinnillu imaqarpoq.


Kiisalu annikitsumik aatsitassarsiorlunissamut akuersissutini maleruagassat paasissutissallu quppersakkap naalernerani nassuiarneqarput.

Quppersagaq oqartussanut attuumassutilinnut, ilanngullugit kommuninut tamanut, nassiussuunneqassaaq. Quppersagaq ornigulluni ingerlatassat akuerineqareersimasut aammalu

piiaanissamut suliasat ingerlasut pillugit paasissutissanik taamaallaat imaqarpoq. Taamaalilluni quppersakkap saqqummiunneqareernerata kingorna ornigulluni ingerlatassanik qinnuteqatigineqarsimasunik aammalu Teknikkinut Nakkutilliinermullu Immikkoortortaqarfimmit akuerineqareersimasunik, taamaattumillu ilanngunneqarsimanngitsunik, ingerlasoqarsimasinnaavoq. Tamatuma saniatigut ornigulluni ingerlatassanik akuerineqareersut, aningaasaqarnermik imaluunniit pissutsinik allanik pissuteqartumik ingerlanneqartussaannngitsut, taaneqarsimasinnaapput.

Atuarluarina!


Aatsitassarsiorluni misissuinissamut kiisalu piiiaanissamut akuersissutitut nunap assinga (juli 2025)



Legende

- Byer og bygder
- Mineral Exploration Licence (MEL)
- Mining Exploitation Licence (MIN)

2025-mi ornigulluni ingerlatassanut pilersaarutigineqartunut takussutissiaq



Aatsitassarsiorluni misissuinissamut piiaanissamullu akuersissutit sorliit ingerlatsivigineqartut naatsorsuutigineqarnersut nunap assingani takutinneqarput.

Sungaartumik qalipaatinni piiaanissamut akuersissutit takutinneqarput, tungujortumik qalipaatinni aatsitassarsiorluni misissuinissamut akuersissutit takutinneqarput.

Quppernemi tulluuttuni aatsitassarsiorluni misissuinerup iluani ornigulluni ingerlataqarnerit sukumiisumik nunap assitalerlugit erseqqinnerusumik nassuiarneqarput, sumiiffiit aatsitassanut tunngasunik suliaqarfiusut malillugit aggulunneqarlutik. Aatsitassanut tunngasunik suliaqarnerit taaneqartut pingaartumik ingerlatseqatigiiffinit nunanit allaneersunit ingerlanneqarput, taakkunani amerlanersai, sumiiffimmi akuersissuteqarfigisaminni nunap sannaani geofysiske-nillu misissuinerup, killiffeqarlutik. Ingerlatseqatigiiffiit ataasiakkaat siunissap qaninnerpaap iluani piiaanissamut akuersissumik siunnerfeqarput, ingerlatseqatigiiffiit ilai piiaanermut immikkoortumiillutik.


Aatsitassarsiorluni misissuinissamut piiaanissamullu suliassat matuma siuliani taaneqartut saniatigut nunap sannaannik nunap assiliornerit aammalu nunap sannaani suliassanik, Aatsitassanut Inatsisinillu Atuutsitsinermut Naalakkersuisoqarfiup ataani Ujarassiornermut Immikkoortortaqaarfimmit ingerlanneqartuni, nassuiaanernik quppersagaq imaqarpoq. Aammattaaq ilisimatuussutsikkut ornigulluni ingerlatassat GEUS-imit allaniillu sullissivinnit ingerlanneqartut nassuiarnerannik quppersagaq imaqarpoq.

Anigorniagassarpassuusarput, silamut tunngasutut ittut, aningaasaqarnermut minnerunngitsumillu piffissakilliornermut tunngasut, ingerlatseqatigiiffiup siunissamut pilersarusiornissaanut pingaaruteqartartut. Pissutsit taakkua allatut aaqqissuussinermik immaqalu ingerlatassatut pilersaarutigineqartut kinguartinneqarnerannik malitseqarsinnaapput, taamaattumillu aasap ingerlanerani ingerlatassatut nassuiarneqartut taakkua allanngorsimasinnaapput. Teknikkinut Nakkutilliinermullu Immikkoortortaqaarfik quppersakkami matumani atuartunut pisariaqartitsinermi paasissutissanik annertunerusunik pissarsinissamut ikiuuttarpoq, soorlu nunap assingi najoqqutassat aammalu ornigulluni ingerlatassanut piffissaliussat assigisaallu.

Maleruagassat sukumiinerusut pillugit apequtissaqaraanni Teknikkinut Nakkutilliinermullu Immikkoortortaqaarfimmut saaffiginnilluni pissarsiarineqarsinnaapput.

Avannaata Kommunia

Avannaata Kommuniani aatsitassarsiorluni misissuinissamut pisinnaatitsissutini aammalu piiaanissamut pisinnaatitsissummi ataatsimi ornigulluni ingerlatassat katillugit sisamaapput, tamarmik saqqummersitap saqqummersinneqarnerata nalaani aallartinneqareersimallutik. Ingerlatassat taakkua kommunimut nunap assingani matuma kingulianiittumi takuneqarsinnaapput:



MPL 2024-100 & MEL 2025-32: Xploration Services Greenland A/S

Ilulissat eqqaanni ornigulluni ingerlatassanut pingaarnertigut siunertaavoq, lithium-inik, tassaasunik aatsitassat qaqutigootut saffigassartai, mingutsitsinngitsumut allanngoriartortitsinissamut aalajangiisuulluinnartut, paasisaqarnissaq siunertaralugu misissueqqaarnernik kiisalu aatsitassarsiorluni misissuinernik ingerlatassanik suliaqarnissaq. Oqaluttuarisaanikkut isigalugu lithium-inik peqarfiit Kalaallit Nunaanni siusinnerusukkut misissorneqarsimanngillat. Ornigulluni ingerlatassat 2025-mi juunip aallartinneraniit decembarip naalerneranut ingerlanneqartussaapput. Xploration Services Greenland A/S-ip nunap sannaanut nunap assiliornermik suliaqarneq ingerlanniarpaa. Issoq aammalu ujaqqanit misissugassat kaataq, nivaataq qillerullu atorlugit piiarneqassapput.

Misissuinerup ingerlanissaata siulliup aasap ingerlanerani naammassinissaanut sapaatip akunneri ikittuinnaat sivilisuseqartussaavoq. Maannakkorpiq asimi tammaarsimaarfimmik pilersitsinissaq imaluunniit qillerinernik suliaqarnissaq pilersaarutigineqanngillat, kisianni qulimiguulinnut tammaarsimaarfiit minnerusut pilersinneqarsinnaapput. Ingerlatseqatigiiffiup qulimiguullit H-125 Air Greenland A/S-meersut asimi suliaqarnermut atorniarpai. Asimi suleqatigiit unnuisarfissaannut inissiat attartortittakkat imaluunniit najukkani akunnittarfiit atorneqassapput. Najukkani kalaallit paasisimasallit sapinngisamik annertuumik atorneqassapput, kisianni lithium-inut paasisimasallit Canada-meersut ikiortigineqartassapput. Timmissanik, umimmannik, tuttunik nannunillu


alapernaarsuinissaq illersuinissarlu pingaaruteqartoq Xploration Services Greenland A/S-ip ataqqivaa aammalu taakkua sumiiffimmi aatsitassarsiorluni misissuiffigineqartumiissappata attaviginiarsarinnginnissaat anguniassallugu.

MEL 2017-26: Zawar Greenland ApS

Zawar Greenland ApS-ip 2025-mi juunip naalerneraniit septembarip qiteqqunnerata tungaanut Saqqap qooruani ornigulluni ingerlatassat suliariniarpai. Tassani Xploration Services Greenland A/S, asimi ingerlasussanik piareersaanermik aqutsisussaq, peqatigalugu Saqqami kuultisiorfissaq suliaqarfiginiarpaat. Asimi tammaarsimaarfik pilersinneqassaaq aammalu ikummatissaq kiisalu atortut sumiiffimmut Royal Arctic Line-mit aamma K.J. Endeavour-imit assartorneqassallutik. Asimi suleqatigiittussat qulimiguullit H-125 Air Greenland-imeersut atorlugit sumiiffimmut assartorneqartassapput. Saqqap qooruani ingerlatseqatigiiffik qillerinernik ingerlatassanik suliaqarniarpoq aammalu ujaqqanik sioqqanillu misissugassanik katersiniarluni. Zawar Greenland ApS-ip, Xploration Services Greenland A/S-ituulli, timmissat, umimmaat, tutut nannullu malinnaavigineqarnerat illersorneqarnerallu pingaaruteqartoq akueraa, taakkualu sumiiffimmi aatsitassarsiorluni misissuiffiusumi angalaassappata, uumasut attaviginiarnissaasa pinngitsoortinnissaa anguniassallugu.

Kommune Qeqertalik aamma Qeqqata Kommunian

Kommunini marlunni taakkunani saqqummersitap saqqummersinneqarnerata nalaani aatsitassarsiorluni misissuinerlutik attuumassutilimmik ornigulluni ingerlatassaq ataasiinnaq, kommunimut nunap assingani matuma kingulianiittumi takutinneqartoq, ingerlanneqarpoq:




MEL 2011-54: Premium Nickel Resources Ltd

Ingerlatassaq Premium Nickel Resources Ltd-
ip sumiiffimmi akuersissuteqarfimminni
ingerlataat tassaavoq, ingerlatseqatigiiffiup
asimi tammaarsimaarfitoqaanik Qeqqata
Kommuniani Paiattoq-mi inissisimasumik
saliilluni suliassat. Saliilluni suliassaq 2025-mi
juulip naalernerani aallartinneqarpoq aammalu
qisuit sulliviusimasut
ikuallanneqartussaallutik. Taamaattumik
sumiiffimmit ikuallaaviusumit pujuliornermik

tamatuma malitseqarnissaa ingerlatseqatigiiffiup naatsorsuutigaa. Innerup siaruarnissaa
pinngitsoortinniarlugu ingerlatseqatigiiffik sumiiffimmi qatserutinik atortoqarpoq aammalu
qulimiguulik sumiiffimmiilluni. Saliilluni suliassaq ulluni arfineq marlunni ingerlanneqassaaq
aammalu 2025-mi aggustip aallartinnerani naammassissasoq naatsorsuutigineqarluni.

Kommuneqarfik Sermersooq

Kommuneqarfik Sermersuumi ingerlatassat ingerlanneqartut qulingiluaapput. Nunap assingani matuma kingulianiittumi kommunimi sumi ingerlatassat suliarineqarnersut takuneqarsinnaavoq:



MEL 2021-56: Hudson Resources Inc.

Hudson Resources Inc.-ip 2024-mituulli, aluminiumoxid-inik tunisassiornissamut misileraatitut suliniummut pisussanut pilersaarutip aammalu cementiliornermik misileraalluni suliaqarnerup ingerlanneqartup tunngavissinnissaannut, anorthosit-inik misissugassanik katersinissaq kissaatigaa. Nuup Kangerluata avannarpasinnerusortaani sumiiffimmi akuersissuteqarfimminni qaqqap naqqaniit anorthosit-inik katersinissaq ingerlatseqatigiiffiup kissaatigaa. Ornigulluni ingerlatassatut pilersaarutigineqartut sumiiffiit timmissat ineqarfiisa sunnertiasut qanitaanni ingerlanneqartussaapput, taamaattumik ornigulluni suliaqarnissamut maleruagassat tamarmik malinneqarnissaat ingerlatseqatigiiffiup qulakkiissallugu. Misileraanermik suliaqarnissamut anorthosit-inik misissugassanik naammattunik nutaanillu katersisoqartussaavoq. Ujaqqanik misissugassanik sapinngisamik nutaanerpaanik pissarsinissamut, kiisalu anorthosit-inik misissugassanik naammattunik katersinissamut, qaartiterinernik

suliaqarnissaq ingerlatseqatigiiffiup kissaatigaa. Misissugassanik 15 tonsinik, sumiiffimmi killissalersorneqartumi qaartiterneqartussanik, tigusinissaq pilersaarutigineqarpoq. Tamatuma saniatigut misissugassanik katersinissamut qillerut tigummiaannartagaq atorneqassaaq. Anorthosit-it misissugassat Danmarkimi Canadamilu laboratoriamut erseqqinnerusumik nunap sannaasa akuinik misissueqqissaarnissamut misileraanissamullu nassiunneqartarput. Qaartiterinernik suliaqarnissaq sioqqullugu qillerinerit naammassinissaannut inuit marluk ulloq ataaseq marlulluunniit atortussaavaat. Tamatuma kingorna qaartiterinermut aqutsisup najukkameersup qaartiterineq ingerlatissavaa.

Misileraanermut pisussanut pilersaarutip saniatigut, ingerlatseqatigiiffiup pisinnaatitsissuteqarfiani anorthosit-it pitsaassusaannik naliliinerup ingerlatiinnarnissaa, minnerunngitsumillu aallaaviusussanik misissuinissamut avatangiisini paasissutissanik katersinerup aallartinnissaa, Hudson Resources Inc.-ip kissaatigaa. Misissugassanik tigusinissamut pisussanut pilersaarutip avatangiisinut tunngasortaa, ornigulluni pisussanut pilersaarutip sinneranit sulisut ataaseq imaluunniit marluk suleqatigalugit, piffissami sapaatip akunnerata ataatsip missaanik sivissussilimmi WSP-imit suliarineqassaaq aammalu aggustip qiteqqunnerani aallartinneqassalluni. Ornigulluni ingerlatassat tamarmik 2025-mi aggustip naalernerani naammassereersimanissaat naatsorsuutigineqarpoq.

MEL 2024-01: Itinnera Solution ApS

Itinnera Solution ApS-ip (Itinnera) aatsitassarsiorluni misissuinissamut pisinnaatitsissutimi MEL 2024-01-ip ataani ornigulluni ingerlatassat marluk ukioq manna pilersaarutigai. Ornigulluni ingerlatassat marluk taakkua matuma kinguliani nassuiarneqarput.

2025-42: Itinnera Solutions ApS

Nunarsuaq tamakkerlugu naggorissaatinut inuit pilersitaannut pissusissamisoortumik taarsiutassatut aammalu CO²-nik annikillisitsinissamut periaasissatut, Kalaallit Nunaanneersunik ujaqqat qajuusaannik avammut nioqquteqarnissaq Itinnerata siunnerfigaa. Marraq sermimeersoq nunaatillit nunaataannut naleqquttunut siaruarterneqarpat, atortussiassaq aasussaavoq, tamatumalu kingunerisaanik naasut inuussutissaqalertussaapput aammalu CO²-nik tigooqqaanerup ingerlanera aallartinneqartussaalluni, taamaalillunilu naggorissaaneq CO²-nik pilersitsisusnaanani.

Atortussiassat naggorissaataanni aammalu CO² -mik annikillisitsisinnaaneranik ilisimatusarnerup ilaatut Ilulialik i Nuup Kangerluani Ilulialimmi suliaassap sumiiffissaatut siunnersuutigineqartumi

Itinnera atortussiassanik misissugassanik tigusinissamik pilersaaruteqarpoq. Misissugassanik tigusinissamut siunertaavoq ilisimatuussutsikkut asimi misileraanermik suliaqarnissaq, tassani atortussiassat avatangiisini assigiinngitsuni qanoq qisuariartarnerat pillugu annertunerusunik ilikkagaqarnissamut, misissugassat nunarsuarmi kiannerusuniittuni nunaleriffiusunut siammarterneqassallutik. Tamanna atortussiassat siunissami niuernermi naleqarnerannik tikkuussisussaavoq. Aamma siunertaavoq marrarmik sermimeersumik atortussiassamik piareersaalluni suliaqarnissamut periaasissanik assigiinngitsunik misileraanissaq. Ilulialimmi suliaq taamaalilluni Itinnera Solutions ApS naapertorlugu naaralaartitsivittut suliaassaavoq, marraap sermimeersup periarfissaqarfiinik takutitsisussaq kiisalu tunisassiap piumaneqarneranik misileraaviusussaq.

Ingerlatseqatigiiffik aggustimiit novembarimut ornigulluni ingerlatassanik suliaqassamaarpoq, tassani kangerluup qinnguani kinnerit 1.000 tons tikillugit katersussallugit. Misissugassanik tigusinissamut imaarsaatit assaanermilu atortut ingerlatinnissaannut najukkameersut sulisorineqassapput. Misissugassanik katersinissaq katillugu ulluni qulini sivilisussuseqassasoq naliliisoqarpoq, taakkualu aasap naajartulernerani ukiamullu qaammatini agguarneqassallutik. Itinnera Solutions ApS ukiuni siusinnerusuni taamaaqataannik ornigulluni ingerlatassanik suliaqarsimavoq, taamaalillunilu ingerlatseqatigiiffik ingerlatassat pineqartut ingerlannissaannut sungiusimannilereersimalluni. Ingerlatseqatigiiffik naliliivoq ingerlatassat sumiiffimmi aallaanianut najukkameersunut ajornartorsiortitsissanngitsoq, aammalu ulluni misissugassanik tigusiffiusuni assaaviusussamiit 0,5 km² missaanni ungasissusilimmi aalisarnerup sunnerneqarnissaa killeqarluni. Pingaarnertut isigalugu ingerlatassat sumiiffimmi uumasunut naasunullu akornusersuissanngitsoq ingerlatseqatigiiffiup naatsorsuutigaa aammalu ornigullutik suliaqartut tamatuma pinngitsoornissaa eqqumaffigissavaat.

2025-62: Itinnera Solutions ApS

Immap naqqaniit misissugassanik tigusinissap saniatigut, Atammiup kangiani ingerlatseqatigiiffiup pisinnaatitsissuteqarfiani misissugassanik katersinermi ingerlatassanik aallaaviusussanik avatangiisinut paasissutissanik katersinermik ingerlataqarnissaq aamma Itinnera Solutions ApS-ip kissaatigaa. Aallaaviusussanik avatangiisinut paasissutissanik katersineq 2025-mi juunip naalernerani ingerlanneqarpoq aammalu imaani avatangiisini tikkuussisussanik misissuineq kiisalu sumiiffiup misissugassanik tigusiffigineqartup eqqaani sinerissami sumiiffimmi tigussaasuni qanoq issutsinik uuttortaaneq, ilaatinneqarlutik. Paasissutissat taakkua VVM-imi misissuinissamut (avatangiisinik misissuineq) tunngavissaliissapput. Aallaaviusussanik avatangiisinut paasissutissat umiatsianit minnerusunit pisinnaarlunilu katersorneqassapput. Ingerlatseqatigiiffik naliliivoq, ingerlatassami katersinermi periaaseq kiisalu annertussusaa ulluni arfineq marlunni ingerlanneqarsinnaasussatut missingersorneqartoq pissutigalugu, ingerlatassat najukkami piniarnermut aalisarnermullu sunniuteqassanngitsoq. Suliaqartussaq najukkameersoq, atortussiassanik misissugassanik katersinissamut assartuussinissamullu ingerlasussanik piareersaanikkut pisinnaasaqartoq, atorneqassasoq pilersaarutigineqarpoq.

Ingerlatseqatigiiffiup pisinnaatitsissutaani MEL 2024-01-imi ornigulluni ingerlatassat marluk taakkua saniatigut, ingerlatseqatigiiffik aamma ingerlatassat pingajuannik pilersaaruteqarpoq.

MPL 2023-119: Itinnera Solutions ApS

Pisinnaatitsissummi tassani ingerlatseqatigiiffik martsip qiteqqunneraniit juunip qiteqqunneranut immap naqqaniit marrarmik sermimeersumik misissugassanik tigusisarnertut ittunik misissueqqaarnermi ingerlatassanik suliaqarsimavoq. Siunertamut tassunga Itinnera Solution ApS-ip Sermilimmi Nuup kujataani pisinnaatitsissuteqarfimminni atortut tigummiaannartakkat atorsimavai. Ingerlatseqatigiiffiup pilersaarut malillugu atortussiassanik misissugassanik katillugit 7-14 kiilunik katersisimavoq. Misissugassanik tigusisarnerup saniatigut aamma Targa 23-27, GPS-eqartoq aammalu sonarsystem-eqartoq, atorlugu sumiiffimmi immap itissusaa misissorsimavaat. Misissugassanik tigusinissaq ulloq ataasiinnaq sivisussuseqartussatut pilersaarutigineqarsimavoq aammalu umiatsiami suliaqartuusunit sulisut najukkameersut sulisorineqarsimallutik.

MPL 2022-77: Nalunaq A/S

Misissueqqaarnermi ingerlatassani, Narsarsuup avannaani sumiiffimmi akuersissuteqarfimminni, kuulte qarfeqarnera, kanngussa qarfeqarnera allanillu aatsitassanik pe qarfeqarnera ilimanaateqartumi, ujaqqanik misissugassanik tiguisarnerup ilaatinnessaa Nalunaq A/S-ip kissaatigaa.

Ingerlatseqatigiiffiup 2025-mi juunip aallartinneraniit decembarip naalerneranut ujaqqanik misissugassanik katersinissaq kissaatigaa.

MEL 2025-40: Vision Geology AB

Ornigulluni ingerlatassani Vision Geology AB-ip ingerlakkusutaanni ilaatinneqarput nunap assiliorneq misissugassanillu tiguisarneq, taannalu ingerlatseqatigiiffiup 2025-mi juulip aallartinnerani aallartippaa. Nunap assiliorneq aamma ujaqqanik misissugassanik tigusineq Vision Geology AB naapertorlugu Johan Petersen Intrusionskomplekset-imi nunap sannaani periarfissaqarfiit pillugit ilisimasaqarnerulernermik kinguneqartussaavoq. Komplekset qaqqamiippoq, tamaani ukiut milliardit arlalippassuit matuma siorna magma ujaqqanut pioreersunut pulasimalluni, taakkualu katitigaanerat allannortissimallugu. Nunap sannaanik misissuinerit pingaartumik intrusionen-imi nikkeleqarsinnaaneranut sammitinneqarput. Ornigulluni ingerlatassat suliarineqarnerisa ingerlaneranni inuit marluk suleqatigiit ullut tamaasa Tasiilamiit Ammassallip eqqaani ingerlatseqatigiiffiup pisinnaatitsissuteqarfiani asimi suliaqarfiusussamut siumut utimullu qulimiguulimmut ilaasassapput. Asimi suleqatigiit Tasiilami najugaqarsimapput, taamaattumik sumiiffimmi pisinnaatitsissuteqarfiusumi asimi tammaarsimaarfiliisoqarsimanani.

Ornigulluni ingerlatassap taakkua naammassereernerata kingorna Vision Geology AB-ip 2025-mi aggustimiit oktobarimut komplekset qulaallugu qulimiguulimmik misissuinerit ingerlatissamaarpai. Qulimiguulimmik qulaavaalluni timmineriit nipiliortitsisussaapput, kisianni ukiaanerani piffissami killilimmi ingerlanneqartussaallutik. Asimi ikummatissamik inissisimatitsinissaq pisariaqartinneqartussaannilaq. Ingerlatseqatigiiffiup qulimiguulimmik timmisartuussinernut allatigullu ingerlasussanik piareersaanermut atatillugu najukkameersut sullissinernik neqerooruteqartut atorniarpai. Quppersakkamik atuartoq ornigulluni ingerlatassanut apeqqutissaqarpat, Vision Geology AB attaveqarfigineqarsinnaasoq, ingerlatseqatigiiffik paasissutissiivoq.

MPL 2024-100: Xploration Services Greenland A/S

Xploration Services Greenland A/S ukioq manna misissueqqaarnissamut pisinnaatitsissuteqarfimmi MEL 2024-01-ip Kommuneqarfik Sermersuumi inissisimasup, ataani ornigulluni ingerlatassanik marlunnik pilersaaruteqarpoq. Ornigulluni ingerlatassat marluk taakkua matuma kinguliani nassuiarneqarput.

FELT 2025-114 aamma FELT 2025-117: Xploration Services Greenland A/S

Ornigulluni ingerlatassami tassami lithium-inik, tassaasoq saffiugassaq pisariaqartinneqarluni pingaaruteqartoq, mingutsitsinngitsumut allanngoriartortitsinissamut aalajangiisuulluinnartoq, peqarfinnik misissuisoqassaaq. Oqaluttuarisaanikkut isigalugu lithium Kalaallit Nunaanni aatsitassarsiorluni misissuiffigineqarsimanngilaq, aammalu maannamut saffiugassamik peqarfinnik ilisimannittoqarani. Pisuinnarluni nunap sannaanut nunap assiliornermik suliaqarneq ingerlanneqassaaq. Asimi suleqatigiit atortut tigummiaannartakkat atorlugit nunaameersunik ujaqqanillu misissugassanik katersiniarput. Ingerlatseqatigiiffiup qulimiguulik Air Greenland A/S-imeersoq atorlugu sumiiffik misissueqqaarfiusussaq ornittassavaa aammalu asimi suliaqarnerup nalaani najukkami unnuisarfiit atorniarlugit, tassami ingerlatseqatigiiffiup sapinngisamik annertunerpaamik Kalaallit Nunaanni kiffartuussinerit najukkamiittut atornissaat kissaatigimmagu. Asimi pisussanut pilersaarut tamakkiisoq 2025-mi decembarip naalernerani naammassissasoq naatsorsuutigineqarpoq.


MEL 2024-67: Xploration Services Greenland A/S

Ingerlatseqatigiiffiup misissueqqaarnissamut pisinnaatitsissutaata ataani asimi ingerlatassat saniatigut ingerlatseqatigiiffik aamma juunip aallartinneraniit Paamiut kujammut kangiani & Nuup Kangerluata eqqaani pisinnaatitsissuteqarfimminni asimi ingerlatassanik suliaqarnerit ingerlanniarpai. MPL 2024-100 ataani ornigulluni ingerlatassatuulli, asimi ingerlatassat taakkua aamma nunap sannaanut nunap assiliorneq aamma misissugassanik tiguisarneq atorlugit lithium-inik peqarfeqarnerisooq misissuinerusussaapput. Ingerlatassaq taanna aallaqqaammut sapaatit akunnerinik marlussunnik sivisussuseqartussatut pilersaarusiorneqarpoq. Xploration Services Greenland A/S-ip tamatuma kingorna, nunap sannaanik nunap assiliornerup inernerit iluatsilluassappata, 3000 meterinik qillerinermi pisussanut pilersaarut suliariniarpaat.

Ingerlatseqatigiiffiup Air Greenland A/S-imi qulimiguulinnik sumiiffik aatsitassarsiorluni misissuiffiusoq ornittassavaa, aammalu asimi suliaqarnerup nalaani najukkami unnuisarfiit atussallugit kiisalu najukkani Kalaallit Nunaanni kiffartuussinerit atussallugit. Asimi pisussanut pilersaarut 2025-mi decembarimi naammassissasoq naatsorsuutigineqarpoq.

MEL 2025-01: Skyfire Ltd

Ornigulluni ingerlatassat Skyfire Ltd-ip ingerlanniagaanni ilaatinneqarput geofysiskinik silaannarmit misissuinerit, tassani ingerlatseqatigiiffiup droni atorlugu geotermiskinik kajungerisaqarneranillu paasissutissanik assiliisassalluni katersissallunilu. Aamma Nerlerit Inaanni Nunanut tamalaanut mittarfimmit aallaavilimmik silaannarmit geofysiskinik misissuinerit (kajungerisaqarnera aamma gravimetriske) ingerlanneqassapput. Tamatuma saniatigut Skyfire Ltd nunap iluaniit imermik gassimillu misissugassanik katersiniarpoq. Misissuinerit pilersaarutigineqartut taakkua Ittoqqortoormiit aamma Uunartip eqqaani ingerlanneqassapput. Ornigulluni ingerlatassani siunertaavoq helium-inik ujaasinermi aaqqiissutissat mingutsitsinngitsut piujuartussat ilisimatusarfiginissaat. Helium tassaavoq gassi mingutsitsisanngitsoq, nakorsaasiornermut aalajangiisuulluinnartoq. Helium saniatigut Skyfire Ltd-ip aamma sumiiffimmi pisinnaatitsissuteqarfiusumi nunap iluata kissassusaanut tunngasut misissorniarpai. Nunap iluata




kissarneranit nukissiaq immaqa Ittoqqortoormiini piujuartussamik innaallagissiornermut kiassarnermullu atorneqarsinnaassaaq. Skyfire Ltd naliliivoq ornigulluni ingerlatassat najukkami inuiaqatigiinnut pitsaasumik sunniuteqassasut, tassami asimi ikiortit najukkameersut pingasut, ornigulluni ingerlatassani tapersiisussat, sulisorisussaagamikku. Asimi suleqatigiit tamatuma saniatigut najukkami unnuisassapput. Ingerlatassat uumasunut kiisalu aallaaniarluni, piniarluni aalisarlunilu ingerlatanut pisariaqanngitsumik akornusersuissasut naliliisoqanngilaq. Asimi suleqatigiit sumiiffimmi pisuinnartussaapput aammalu ornigulluni ingerlatassat 2025-mi septembarip naalernerani naammassineqarnissaat

naatsorsuutigineqarpoq, tassani imeq gassilu misissugassat naggataatigut geokemiskimik erseqqinnerusumik misissoqqissaarneqartussanngorlugit misileraanissamullu laboratoriamut nassiunneqassallutik.

Kommune Kujalleq

Kommune Kujallermi ingerlatassat 16-it ingerlanneqarsimapput imaluunniit ingerlanneqartussaallutik, tamannalu isumaqarpoq Kalaallit Nunaanni kommuni taanna amerlanerpaanik ingerlataqarfigineqartoq. Ingerlatassat 16-it taakkua nunap assingani matuma kinguliani takuneqarsinnaapput.



MEL 2020-31: Gardaq ApS

Aatsitassarsiorluni misissuineri ingerlatassani pilersaarutigineqartuni ilaatinneqarput aatsitassarsiornermi pilersaarusiormi aqqissuussinerit, nunap sannaanut nunap assiliorneq kiisalu ujaqqanik nunaameersunillu misissugassanik siunnerfilimmik aamma tulleriissaartumik periaaseqarluni misissugassanik tiguisarneq. Asimi suleqatigiittussat ujarassiuut tallimat Narsarsuami aallaavilimmit qulimiguulimmit taparserneqassapput. Misissuineri ingerlatassat junip aallartinnerani aallartinneqarput aammalu 2025-mi oktobarip naalernerani naammassineqassallutik.

MEL 2020-41: Gardaq ApS,

Narsarsuup avannamut kitaani sumiiffimmi akuersissuteqarfiusumi, Gardaq ApS-ip ingerlatseqatigiiffiup pisinnaatitsissuteqarfiata MEL 2020-31 ataani ornigulluni ingerlatassat taakkua ingerlatissamaarpai, tassalu aatsitassarsiornermi pilersaarusiornermi aaqquissuussinerit, nunap sannaanut nunap assiliorneq kiisalu ujaqqanik nunameersunillu misissugassanik siunnerfilimmik aamma tulleriissaartumik periaaseqarluni misissugassanik tiguisarneq. Ujarassiuut tallima ornigulluni ingerlatassami tassani peqataassapput aammalu ingerlatassaq ullunik 14-inik sivilissuseqassasoq 2025-milu oktobarip naalernerani naammassissussatut naatsorsuutigineqartoq, ingerlatseqatigiiffiup naatsorsorpaa.

MEL 2021-02: Gardaq ApS

Narsarsuup kitaani sumiiffimmi akuersissuteqarfiusumi, ingerlatseqatigiiffiup pisinnaatitsissutaata MEL 2020-31-p aamma MEL 2020-41-p (MEL 2020-41-mut nassuiaat matuma siuliani takuuk) ataanni ornigulluni ingerlatassat matuma siuliani taaneqartut assinginik ingerlataqarnissaq Gardaq ApS-ip kissaatigaa. Ingerlatassat aamma piffissami tassani ingerlanneqassapput.

MEL 2023-69: Gardaq ApS

Gardaq ApS-ip sumiiffiisa sisamaanni, MEL 2023-69-imi, Kalaallit Nunaata kujataata kangiani inissisimasumi, ornigulluni ingerlatassat annikinnerusumik misissugassanik tiguisarneq kiisalu nunap sannaanut nunap assiliorneq ilanngullugit, ingerlannissaat ingerlatseqatigiiffiup kissaatigaa. Ornigulluni sulineq juunip aallartinnerani aallartinneqassapput aammalu ujarassiuut sisamat, timmisartortartoq ataaseq kiisalu inuk isumannaallisaanermut akisussaasuusoq inuttaralugit ingerlanneqassalluni. Inuttat Qaqortumi, Narsarsuarmi, Nalunami imaluunniit Nalunap eqqaani qillerisut tammaarsimaarfianni unnuisinneqartassapput. Ingerlatassat 2025-mi oktobarip naalernerani naammassineqassapput.

MEL 2023-70: Gardaq ApS

Ornigulluni ingerlatassat Nunarsuit eqqaanni pisinnaatitsissuteqarfimmi ingerlatseqatigiiffiup ingerlakkusutai, tassaapput kuulteqarfinnik, kanngussaqaarfinnik, aatsitassanik qaqutigoortunik peqarfinnik allanillu saffiugassanik peqarfinnik misissuinerit. Aatsitassarsiorluni misissuineri ingerlatassat juunip aallartinnerani aallartinneqarput aammalu Gardaq ApS 1 kilo angullugu ujaqqanik misissugassanik, nunap sannaata akuinik misissueqqissaarnissamut nassiunneqartussanik, katersiniarpoq. Ingerlatassat ujarassiuunit Gardaq ApS-imeersunit tallimat angullugit

amerlassuseqarlutik suleqatigiittussanit, ullut tamaasa Narsarsuarmiit sumiiffimmut pisinnaatitsissuteqarfiusumut qulimiguulimmik timmisartuunneqartartussanit, ingerlanneqassapput. ingerlatassat 2025-mi oktobarip naalernerani naammassineqassasut pilersaarutigineqarpoq.

MEL 2025-17: Gardaq ApS

Sumiiffimmi akuersissuteqarfiusumi MEL 2025-17-imi, Narsarsuup eqqani inissisimasumi, ornigulluni ingerlatassat aallartereerput. MEL 2023-70-imut pisutut, sumiiffimmi pisinnaatitsissuteqarfiusumi tassani ornigulluni ingerlatassat aamma kuultisiorluni, kanngussarsiorluni, aatsitassanik qaqutigoortunik allanillu aatsitassarsiorluni misissuinissamik siunnerfeqartinneqarput. Aamma tassani ingerlatassat Narsarsuami aallaaveqartunit ujarassiuunit tallimanit juunip aallartinnerani aallartinneqarput. Gardaq ApS taamatuttaaq 1 kilo angullugu misissugassanik, tamatuma kingorna nunap sannaata akuinik misissueqqissaarnissamut nassiunneqartussanik, katersiniarpoq. Tamatuma saniatigut ingerlatseqatigiiffiup aamma 100 meterit arlallit angullugit qillerinermi pisussanut pilersaarummik ingerlatsinissaq kissaatigaa. Qillerinermi pisussanut pilersaarut aggustimiit septembarimut ingerlanneqassaaq. Ingerlatseqatigiiffik naapertorlugu aatsitassarsiorluni misissuinermi ingerlatassani sumiiffimmi uumasut akornusersorneqassanngillat. Qillerummit qaqitassanik qillerinerit aamma misissugassanik katersinerit saniatigut Gardaq ApS-ip aamma Narsarsuup avannaata kangiani qulimiguulik imaluunniit droni ikiortigalugu nunap sannaata akuinik silaannarmiit misissuinerik suliaqarniarpoq. Ornigulluni ingerlatassat 2025-mi oktobarip naalernerani naammassineqassasut naatsorsuutigineqarpoq.

MEL 2010-02: Greenland Minerals A/S

Greenland Minerals A/S-ip Kuannersuarni pisinnaatitsissuteqarfiani ornigulluni ingerlatassani ilaatinneqarput avatangiisit aallaavigalugit tunngaviusussanik misissuinerit aamma pujoralannik, silamut imermullu uuttortaanernik paasissutissanik katersineq. Misissugassanik tiguisarneq Narsap kuuani aamma Kuannersuarni ingerlanneqassaaq, aammalu aggustip aallartinnerani ulluni tallimani ingerlanneqassasoq naatsorsuutigineqarluni.

MEL 2013-06: Greenroc Graphite Limited

Greenroc Graphite Limited-ip sumiiffimmi pisinnaatitsissuteqarfimminni Kalaap eqqaani kiisalu qeqertani Amitsumi Nanortalimmilu ukiuni siusinnerusuni aatsitassarsiorluni misissuinermi ingerlatami nanginnissat kissaatigaa. Ornigulluni ingerlatassat juulip aallartinnerani aallartissapput

aammalu grafit-isorfitorqamiit, Amitsumi aatsitassarsiorfimmiit, ujaqqanik misissugassanik 40 tons angullugu katersineq ilaatinneqassalluni. Kingusinnerusukkut aatsitassarsiorfimmi tunisassiornermut periaasissamik misileraanissaq, grafit-it saffiugassartaannik piareersaalluni suliaqarnissaq kiisalu sinnikunik passussinissaq siunertaralugit, ujaqqanik misissugassanik tiguisoqassaaq. Misissugassanik katersinermut atatillugu aatsitassarsiorfitorqami qaartiterinernik suliaqarnerit ingerlanneqassapput. Naggataatigut avatangiisini aallaaviusussanik misissuinissaq ingerlatseqatigiiffiup kissaatigaa, tassani sumiiffimmi pisinnaatitsissuteqarfiusumi uumasunik naasunillu misissuineq ilaatinneqassalluni. Ornigulluni suliaqarnermut atatillugu Greenroc Graphite Limited-ip inuit qulit, piffissap asimiiffiusussap ingerlanerani piffissani assigiinngitsuni sulisussat, asimukartissavai. Inuttat Nanortalimmi unnuisinneqartassapput, taamaattumik taakkua taamaallaat ulluunerani nalunaquttap akunnerini pisinnaatitsissuteqarfimmukartassallutik. Ingerlatassat 2025-mi oktobarip naalernerani naammassereersimassasut ingerlatseqatigiiffiup naatsorsuutigaa.

MEL 2022-03: Greenroc Graphite Limited

Ingerlatseqatigiiffiup pisinnaatitsissuteqarfiani MEL 2013-06-imi pisutut, aamma tassani sumiiffimmi siusinnerusukkut aatsitassarsiorluni misissuineri ingerlatassat nanginnissaat ingerlatseqatigiiffiup kissaatigaa. Tassani Greenroc Graphite Limited grafit-inik akoqarnera misissorniarlugu ujaqqanik misissugassanik katersiniarpoq. Ingerlatassat ujarassiuunit marlunniit 2025-mi juulip aallartinneraniit oktobarip naaneranut ingerlanneqassapput. Ornigullutik suleqatigiittussat Nanortalimmi aallaaveqassapput aammalu umiarsuamik ullut tamaasa sumiiffimmut pisinnaatitsissuteqarfimmukartassallutik.

MEL 2025-125: Greenroc Graphite Limited

Ingerlatseqatigiiffiup sumiiffimmi pisinnaatitsissuteqarfimmini, sumiiffinni pisinnaatitsissuteqarfinni MEL 2013-06-imi aamma MEL 2022-03-mi pisutut, grafit-eqarfinnik aatsitassarsiorluni misissuineri ingerlatassat ingerlannissaat, kissaatigaa. Ingerlatseqatigiiffiup sumiiffinni pisinnaatitsissuteqarfiini allani pisutut, tassani ornigulluni ingerlatassat juulip aallartinnerani aallartissapput aammalu 2025-mi oktobarip naalernerani naammassissallutik.

MEL 2015-17: Nalunaq A/S

Kalaallit Nunaata kujataani Ivittuut eqqaanni sumiiffimmi Iterlammi aamma Nuulummi inissisimasumi, Nalunaq A/S-ip nunap sannaata akuinik misissueqqissaarnissamut misissugassanik katersilluni aatsitassarsiorluni misissuineri ingerlatassat ingerlannissaat kissaatigaa.

Ingerlatseqatigiiffiup juulip aallartinneraniit oktobarip naaneranut qulimiguulimmik aallaavilimmik ingerlatassat ingerlannissaat pilersaarutigaa.

MEL 2006-10: Nalunaq A/S

Sumiiffimmi pisinnaatitsissuteqarfiusumi, nunap sannaata akuinik misissueqqissaarnissamut misissugassanik katersilluni aatsitassarsiorluni misissuineri ingerlatassat ingerlannissaat ingerlatseqatigiiffiup kissaatigaa. Ingerlatassat 2025-mi juulip aallartinneraniit oktobarip naaneranut inissisimanissaat pilersaarutigineqarpoq.

MEL 2020-36: Nalunaq A/S

Sumiiffimmi pisinnaatitsissuteqarfiusumi, Eagle's Nest-ip eqqaani inissisimasumi, Nalunaq A/S-ip aatsitassarsiorluni misissuineri ingerlatassat ingerlannissaat kissaatigaa, tassani ilaatinneqarlutik nunap sannaanut nunap assiliorneq, misissugassanik tigusineq kiisalu qillerineri ingerlatassat. 750 meterinik itissusilinni qillerinissaq pilersaarutigineqarpoq. Ingerlatassat juulip aallartinneraniit oktobarip naaneranut ingerlanneqassapput. Inuttat Qaqortumi imaluunniit Nalunaq aatsitassarsiorfimmi tammaarsimaarfiani unnuisinneqartassapput aammalu ullut tamaasa qulimiguulimmik asimi sumiiffiit orninneqartassallutik.

MEL 2022-08: Nalunaq A/S

Sumiiffimmi Sikup eqqaani inissisimasumi ingerlatseqatigiiffiup nunap sannaanut nunap assiliorluni misissugassanillu tigusisarluni aatsitassarsiorluni misissuineri ingerlatassat ingerlanniarpai. Aatsitassarsiorluni misissuilluni ingerlatassat qulimiguulimmik aallaaveqartinneqassapput aammalu ujarassiuunit marlunnit inummillu ataatsimit isumannaallisaanermut akisussaasumit suliarineqassallutik. Ingerlatassani nunap sannaata akuinik misissuinerit 2022-meersut aallaavigineqassapput. Ornigulluni suliaqarneq ullunik 5-inik sivilisuseqassasoq naatsorsuutigineqarpoq aammalu piffissami juulip naaneraniit oktobarip naaneranut ingerlanneqassalluni.

Nalunaq A/S-ip Nanoq eqqaani imaluunniit Stendalen-imi asimi tammaarsimaarfiugallartussamik inissiinissaq, tassangaaniillu qulimiguulimmik timmisartuussineq atorlugu ullut tamaasa sumiiffiit misissuiffiusussat immikkuullarissut ornittarnissaat, kissaatigaa.

MEL 2024-62: Nalunaq A/S

Sumiiffimmi pisinnaatitsissuteqarfiusumi tassani, ilaatigut Eqaluit Iluanni, Issormiuni, Sillisini aamma Narsami, misissugassanik tiguisarnertut ittunik ornigulluni ingerlatassanik suliaqarnissaq ingerlatseqatigiiffiup kissaatigaa. Misissugassanik tiguisinermi, taakkua kuultinik kanngussannillu il.il. akornarnerannut misissoqqissaarneqartassapput. Misissugassanik tiguisarnissaq ingerlatseqatigiiffiup pisinnaatitsissuteqarfiini allani ingerlataqalinnginnermi qaammat sioqqullugu aallartittussatut pilersaarutigineqarput, tassalu imaappoq juulip aallartinnerani aammalu 2025-mi oktobarip naalernerani naammassineqarnissaa naatsorsuutigineqarluni.

MIN 2020-54: Tanbreez Mining Greenland A/S

Ingerlatseqatigiiffiup pisinnaatitsissuteqarfiani Narsap eqqaani Nunasarnaasami inissisimasumi ingerlatseqatigiiffiup siusinnerusukkut misissugassanik tiguisarluni aamma nunap assiliorluni aatsitassarsiorluni misissuinini ingerlatiinnarniarpaa. Misissugassanik tiguisarneq ingerlatseqatigiiffiup juunip aallartinnerani aallartippaa, taannalu pilersaarutit malillugit 2025-mi juulimi qillerinermut pisussanut pilersaarummik malitseqartinneqassaaq.

Misissugassanik tiguisarnerup saniatigut, aamma avatangiisini aallaaviusussanik misissuinermut kiisalu inuiaqatigiinni piujuaannartussamik sunniuteqartitsinissanut nalilersuinermut attuumassutilimmik misissuinernik suliaqarnissaq ingerlatseqatigiiffiup kissaatigaa.

Ingerlatseqatigiiffik sumiiffimmi pisinnaatitsissuteqarfiusumi asimi tammaarsimaarfeqassaaq.

Misissugassat katersorneqartut Qaqortumi piareersarlugit suliarineqartassapput, tamannalu ornigulluni ingerlataqarnermut qullersaqarfiup aamma inissisimaffigissavaa. Sulisut tassaassapput inuit ingerlatseqatigiiffiup Qaqortumi pilersuisuanit pingaarnermit 60 Degrees North-imit sulisorineqartut, taakkualu november 2025-mi novembarip naalernerani ingerlatassat naammassereersimassavaat.

Kommunit aggornerisa avataanni

Sumiiffinni kommunit aggornerisa avataaniittuni ornigulluni ingerlatassat sisamat pilersaarutigineqarput.

MPL 2024-100: Xploration Services Greenland A/S

Sumiiffiup Ilulissat eqqaaniittup saniatigut qeqertaasami Hinks Land-imi Tunumi nunami allanngutsaaliukkami inissisimasumi, misissueqqaarnernik ingerlatassanik suliaqarnissaq Xploration Services Greenland A/S-ip aamma kissaatigaa. Hinks Land-imi ornigulluni ingerlatassanut siunertaavoq, lithium-inik paasisaqarnissaq siunertaralugu misissueqqaarnerni ingerlatassanik suliaqarnissaq. Ornigulluni ingerlatassat 2025-mi juunip aallartinneraniit decembarip naalerneranut ingerlanneqartussaapput. Xploration Services Greenland A/S-ip issoq aammalu qaarsumit misissugassat kaataq, nivaataq qillerullu atorlugit piiartassavai. Misissuinerup ingerlanissaata siulliup aasap ingerlanerani naammassinissaanut sapaatip akunneri ikittuinnaat sivissuseqartussaavoq. Maannakkorpiaq tammaarsimaarfimmik pilersitsisoqassanngilaq imaluunniit qillerinernik suliaqartoqassanani, kisianni qulimiguulinnut tammaarsimaarfiit minnerusut pilersinneqarsinnaapput. Ingerlatseqatigiiffiup qulimiguullit H-125 Air Greenland A/S-imeersut ornigulluni ingerlataqarfissanut sumiiffinnukarnerminni atorpai. Asimi suleqatigiit unnuisarfissaannut inissiat attartortittakkat imaluunniit najukkani akunnittarfiit atorneqassapput. Najukkani kalaallit paasisimasallit sapinngisamik annertuumik atorneqassapput, kisianni lithium-inut paasisimasallit Canada-meersut ikiortigineqartassapput. Timmissanik, umimmannik, tuttunik nannunillu alapernaarsuinissaq illersuinissarlu pingaaruteqartoq Xploration Services Greenland A/S-ip ataqqivaa aammalu taakkua sumiiffimmi aatsitassarsiorluni misissuiffigineqartumiissappata attaviginiarsarinnginnissaat anguniassallugu.

Nunap sannaanut suliassat

Kalaallit Nunaanni ujarassiornermi suliniutit aamma nunap assiliorluni ingerlatassat Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfup ataani Ujarassiornermut Immikkoortortaarfimmit aammalu ilisimatusarnermut sullissivinnit tassunga atasunit, soorlu GEUS-imit, ingerlanneqartarput. Paasissutissat nalunaarsukkat katersorneqartut Kalaallit Nunaanni nunap sanna pillugu nutaanik ilisimasaqalernissamut kiisalu Kalaallit Nunaata aatsitassaqaarsinnaanerani nittarsaassinissamut tunngavissaqalersitsinissamut, atorneqartarput. Misissuinerit taakkua nalinginnaasumik aamma tamanut ingerlateqqinneqartartussaapput.

Matuma kinguliani ujarassiornermi suliniutit, 2025-mi aasaanerani ornigulluni suliarineqartussatut pilersaarutigineqartut, taaneqarput.

CO₂-nik unerartitsineq toqqorsisarnerlu: Qeqertarsuarmi misissuinerit ingerlaannarput

Ornigulluni ingerlatassani Namminersorlutik Oqartussat ingerlanniagaanni, Qeqertaliup Kommuni Nipisanni Qeqertarsuup kujasinnerusortaani qillerinermi pisussanut pilersaarut annikinnerusoq, ilaatinneqarpoq. Qillerinermi pisussanut pilersaarummi Namminersorlutik Oqartussat kissaatigaat lavat tullerriaat sananeqaataat aammalu CO₂-t kalkinngortissinnaanissaannut piginnaaneqarnerat, taamaalillunilu sumiiffimmi CO₂-t lavanut ujaqqanut nipputsinnissaat, pillugit ilisimasani katersinissaq. Lavat ujaqqat CO₂-nik aatsitassanut nippussinnaaneranik misissuinerit, Kalaallit Nunaanni nunap iluani CO₂-nik toqqorsinissamut Kalaallit Nunaanni periarfissaqarfiit aalajangerinissaannut aalajangiisuulluinnarput. Ornigulluni ingerlatassat aggustip aallartinnerani ingerlanneqassapput aammalu qillerinermi pisussanut pilersaarut KSMS ApS-imit ingerlatseqatigiiffimmit najukkameersumit piviusunnngortinneqassaaq. Qillerummit qaqitanik misissugassanik katersinissamut 500 – 600 meterinik itissutilimmut qillerisoqassaaq. Qillerinermi pisussanut pilersaarummut atatillugu putumi qillikkami¹ geofysiskinik sullulinnik uuttortaanerit aammalu nunap sannaani teknikkikkut misileraanerit ingerlanneqassapput. Tamatuma kingorna putumi qillikkami kissatsikkiartorerup kiisalu nunap qerluaannartup annertussusaata uuttortarnissaanut kiassiut ikkunneqassaaq. Ornigulluni ingerlatassap 2025-mi septembarip

¹ Putunik qillikkanik nalunaarsuineq ujarassiornermi periaasiuvoq, nunap sannaata, imeqartut aammalu tigussaasunut uuttuutit misissornissaannut atorneqartartoq, assersuutigalugu kissassuseq, innaallagissap akimmisaarnera kiisalu sarfarnerata sukkassusai aammalu imermi kemi.

qiteqqunnerani ingerlanneqarnissaat naatsorsuutigineqarpoq, tamatuma kingorna qillerummit qaqitat misissugassat, erseqqinnerusumik nunap sannaata akuinik misissueqqissaarnissamut misileraanissamullu, Nuummumt nassiuqqassapput. Naggataatigut misissugassanik misileraanerup inernerit tamanut ingerlateqqinneqassapput.

Namminersorlutik Oqartussat Qeqertaliup Kommuniani ingerlatassaat alla tassaavoq Qeqertarsuup kippasissortaanut nunap sannaanut nunap assiliorneq. Tassani Namminersorlutik Oqartussat 2025-mi aggustip naalerneraniit sumiiffimmi, siusinnerusukkut nunap sannaata ujaranngorsimanerini attuumassutilinnik nassuiaavimusasumi, sumiiffinni assigiinngitsuni nunap sannaani teknikkikkut paasisutissanik katersiniarput. Nunap iluani CO₂-nik toqqorsinissamut lavat piginnaanerisa suussusersisinaanissaannut taamaaliortoqassaaq.

Sakkut tigummiannartakkat atorlugit ujaqqanik misissugassanik katersisoqassaaq kiisalu ujaqqanit qajannartunit seqummaalasuniillu nunap qaavanut qanittumiittunik misissugassanik tiguisoqassalluni. Taamatuttaaq qaqat anitsisartut marraannit nassuiarneqartunit, nunap iluani uuliaqarneranut gasseqarneranullu nalinginnaasumik atatinneqartartunit, misissugassanik katersisoqassaaq. Ornigulluni ingerlatassat Namminersorlutik Oqartussat 2022-mi aamma 2024-mi ornigulluni ingerlataqarneranut nangissutaapput, tassani ingerlatassat assingusut ingerlanneqarsimallutik. Ornigulluni ingerlatassat 2025-mi septembarip aallartinnerani ingerlanneqarnissaa naatsorsuutigineqarpoq.

Mingutsitsinngitsumut allanngoriartortitsinermut Kalaallit Nunaanniittut aatsitassat

Ujarassiornermut immikkoortortaqarfik US Department of State suleqatigalugu Utoqqarmiut Kangerluarsunnguanni tatsip eqqaani Tikisaaq-mi karbonatit-intrusion-ini aatsitassanik qaqutigoortunik peqarfinnik misissuivoq. Aatsitassanik qaqutigoortunik peqarnera karbonatit-inik peqarfiup misissuataarneratigut misissorneqarpoq, tassami taanna aatsitassanik qaqutigoortunik akoqarsinnaammat. Karbonatit ujaraavoq qaqqamit anitsisartumeersoq nalinginnaasuunngitsoq, 50%-ianit annertunerusoq aatsitassaalluni karbonat, aammalu aatsitassanik aningaasaqarnikkut nalilinnik, soorlu aatsitassat qaqutigoortut saniatigut niobium-inik, fosfor-inik, saviminissanik, uranimik, thorium-inik aamma zirkon-inik qaffasissunik akoqarsinnaasutut ilisimaneqartoq. Kalaallit Nunaanni karbonatit aamma Kalaallit Nunaata kitaani Kangilinnguani Ika-mi, Qassiarsummi Sarfartuumilu nassaassaavoq. Karbonatit-inik peqarfiup misissorneqarneranut

siunertaavoq, ilisimasani ingerlatseqatigiiffiit sumiiffimmi pisinnaatitsissummik peqalernissamik kissaateqartut atorsinnaasaannik, ilisimasaqalernissaq.

Ornigulluni suliaqarneq ujarassiuunit/geofysikerinit 7-nit aamma assistentinit isumannaallisaanermullu akisussaasunit 6-nit suleqatigiinnit USA-meersumit Kalaallillu Nunaanneersunit ingerlanneqarpoq. Suliaqarneq tamatuma kingorna ilisimatuussutsikkut misissuinnissat geofysiskinik uuttortaareerni aammalu misissugassanik 300 kg-inik katersereermermi 2025-mi juunip naalernerani naammassineqarpoq. Asimi suleqatigiit Utoqqarmiut Kangerluarsunnguanni asimi tammaarsimaarfeqarsimapput aammalu ullut tamaasa qulimiguulik Tikisaaq-mi misissuiffiusumukarnissamut atortarsimallugu. Namminersorlutik Oqartussanit aallartitap ornigulluni ingerlataqarnerup Tikisaaq eqqaani sumiiffinni sunnertiasuni ingerlanneqannginnissaa kiisalu asimi suliaqarnermi maleruagassat tamarmik malinneqarnerat, nakkutigisimavai. Tamatuma saniatigut aallartitaq ornigulluni ingerlataqarnerup ingerlanneqarneranut ikiuussimavoq. Misissugassat misilerarneqarnerisa inerner 2026-mi Namminersorlutik Oqartussanut atugassanngortinneqassasut naatsorsuutigineqarpoq, tassani tamanut ingerlateqqinneqassallutik.

Tikisaaq-mi ornigulluni ingerlataqarnermi maannakkut amerikamiunik suleqateqarneq, 2020-miilli ingerlasimasoq, naggaserneqarpoq.

Qaqqat sisoornerannut suliniutit

Namminersorlutik Oqartussat immikkut ilisimasallit nunanit tamalaaneersut suleqatigalugit qaqqat sisoortarnerinik misissuataarinerit ingerlanniarpaat. Ingerlatassani ilaatinneqarput Umiammakku Nunaanni aamma Kangerluarsummi, nunaqarfiup Nuugaatsiap kangiani 30 kilometerinik aammalu Kangerluarsuup avannaani 25 kilometerinik ungasissusilimmi, nakkutiginninnermi periaatsit ingerlanneqartut nakkutigineqarnerat. Tamatuma saniatigut Namminersorlutik Oqartussat Uummannap eqqaani sumiiffinni allani qaqqanik qajannartortalinnik misissueqqissaarnissaq kissaatigaat, pingaartumik Nuussuup qeqertaasaata kujataatungaani aammalu Qeqertarsuup avannaata sineriaani Vaigat sinerlugu, tamaani alapernaarsuineramik suliaqarneq ingerlanneqassalluni.

Ornigulluni ingalatassat aappaanni Namminersorlutik Oqartussat ingerlassimasaanni ilaatinneqarpoq sumiiffinnik Nuup kangerluani qaqqanik sisoortoqarsinnaaneramik aarlerinaateqartunik alapernaarsuineq, tassani qaqqat sisoortarnerannut suleqatigiit Qoornumi

Qaarusuup Qaqqaa, Nuup avannamut kangiani 25 kilometerinik ungasissusilimmiittoq, takusarsimallugu. Qoornumi Qaarusuup Qaqqaaani innap kujammut sammisup nunap assiliornissaanut timmisartumiit assilisanik droninik aallaavilimmik immiussisoqarpoq.

Ilisimatuussutsikkut misissuinerit

Ilisimatuussutsikkut misissuinerit ilisimatusarfinni nunanit allaneersuni ilisimatuunit nalinginnaasumik ingerlanneqartarput aammalu ilisimatusarnermik siunertanut nalinginnaasumik ingerlanneqartarlutik. Matuma kinguliani ilisimatuussutsikkut misissuinerit tiguneqartut aamma/imaluunniit akuerineqartut nassuiaataat allattorneqarput, kisianni misissuinerinik quppersakkat saqqummersinneqareernerata kingorna Teknikkinut Nakkutilliinermullu Immikkoortortaarfimmut paasissutissiissutigineqartunik, ilanngunneqanngitsunik, ingerlasoqarsinnaavoq. Aamma ingerlatassaqaarsinnaavoq, assigiinngitsunik pissuteqartumik ingerlanneqartussaajunnaartunik.

Institut/Ilisimatusarfik	Kommune/Sumiiffik	Piffissaq	Annertussusaa/Siunertaa
Muséum National d'Histoire Naturelle, Paris	Kommuneqarfik Sermersooq	14.07 – 31.07.2025	Isuani qorsunnik ujaraqarfimmi ujaqqat pisoqaassusaat aalajangersarniarlugu, taamaaliornermilu nunarsuup siusinnerusukkut oqaluttuassartaa pillugu ilisimasanik katersiniarlutik, kinnerit katersuussimaneranni akuinik, suliassami matumani ilisimatuut Københavns Universitet suleqatigalugu misissuiniarput. Ornigulluni suliaqarneq 2025-mi juulip qiteqqunneraniit oktobarip naalerneranut ingerlanneqassaaq.
Københavns Universitet	Kommuneqarfik Sermersooq	14.07 – 31.07.2025	Frankrig-imi National Naturhistoriske Museum suleqatigalugu ilisimatuut

			Københavns Universitet-imeersut Isuani qorsunnik ujaraqarfimmi 2025-mi juulip qiteqqunnerani aallartillutik ilisimatuussutsikkut misissuiniarput. Ornigulluni suliaqarnermut siunertaavoq kinnerit katersuussimanerisa akuinik misissuataarinissaq, taamaaliornermilu nunarsuup oqaluttuassartaa pillugu ilisimasaqalernissaq. Ujaqqanik misissugassanik, erseqqinnerusumik ilisimatuussutsikkut misissorneqartussanik, 500 kg-inik katersisoqassaaq avammullu annissisoqassalluni. Ornigulluni suliaqarneq juli 2025-mi juulip naalernerani naammassissasoq naatsorsuutigineqarpoq.
Københavns Universitet	Kommuneqarfik Sermersooq	06.08 – 31.08.2025	Lavat issorneranni metamorfose-mi ujarannngortut ineriartortarnerat, Beijing Universitet suleqatigalugu Kristoffer Szilas-ip Københavns Universitet-imeersup misissorniarpaa. Ilisimatuut taamatut

			ineriartorneq Nuup eqqaani misissorniarpaa, aammalu 2025-mi aggustip aallartinnerani ornigulluni suliaqarnerup aallartinnissaa eqqarsaatigaat.
Københavns Universitet	Kommuneqarfik Sermersooq	11.07 – 31.07.2025	Ilisimatuussutsikkut misissuineq taanna nunarsuup siusinnerusukkut oqaluttuarisaaneraniq misissuataarinissamut tunngassuteqarpoq. Ilisimatuut nunarsuarmi qangarsuaq uumassusilinnik peqarsimaneranut Nuup eqqaani kinnerit misissoqqissaarniarpaat. Ornigulluni suliaqarnerit aallartereerput aammalu 2025-mi juulip naalernerani naammassissasut naatsorsuutigineqarluni.
ETH Zurich	Kommuneqarfik Sermersooq	18.07 – 31.08.2025	Ilisimatuut sisamat Konføderations Tekniske Højskole-meersut Atlantikup avannaani nunavittap qalipaani nunavittap qalipaata pileriartorsimaneranut pisut ingerlasimanerinik misissuinissaq kissaatigaat.

			Ilisimatusarnermi suliniut Nuup eqqaani kangerlummi ingerlanneqassaaq. Ujaqqat misissugassat 300 kg katersorneqassapput aammalu sumiiffimmut 3D atorlugu ilusiliamik ilusilersuinissamut droninit immiussisoqassalluni. Ornigulluni ingerlatassat 2025-mi aggustip naalernerani naammassineqassasut naatsorsuutigineqarpoq.
Aarhus University Department of Environmental Science	Kommuneqarfik Sermersooq	27.06 – 31.07.2025	Aarhus Universitet uumassusillit pilersimanerannik misissuinissaq siunertaralugu ornigulluni ingerlatassanik suliaqarniarpoq. Ornigulluni ingerlatassat Isuani qorsunnik ujaraqarfimmi, erseqqinnerusumik oqaatigalugu qeqertami Akiliani, ingerlanneqassapput. Ingerlatassat 2025-mi juunip naalernerani atortut tigummiaannartakkat atorlugit ujaqqanik misissugassanik katersilluni aallartinneqarput. Ornigulluni sulineq 2025-mi juulip naalernerani

			naammassineqassasut naatsorsuutigineqarpoq.
University of Milano	Qeqqata Kommunia	17.07 – 31.07.2025	Italiamiut ilisimatusarfiat nunarsuup qaavata nunap sannaatigut ineriartorsimanera misissuataarniarlugu, ilaatigut aatsitassanik amfibol-inik katersinissamik kissaateqarpoq. Tamanna Qamasup Kinginnerani, Qeqqata Kommunianiittumi, misissuataarneqarsinnaavoq. Ornigulluni ingerlatassat pisuinnarluni ingerlanneqassapput aammalu ilisimatuussutsikkut misissuineq 2025-mi juulip qiteqqunnerani aallartinneqarpoq aammalu juulip naalernerani naammassineqarnissaa naatsorsuutigineqarluni.
University of Wollongong	Kommuneqarfik Sermersooq	07.08 – 31.08.2025	Wollongong Universitet Nuup eqqaani nunarsuup qalipaata ineriartorsimanera pillugu ornigulluni suliaqarluni isumasioqatigiinnermik ingerlatsinissamik kissaateqarpoq. Siunertaavoq Wollongong Universitet-ip

			aamma Japansk universitet-ip akornanni ataatsimoorluni ilinniartitaanermut ilisimatusarnermullu suliniutip ilaatut, ilisimatuut Japan-imeersut pingasut nunarsuup siusinnerpaamik pileriaartulersimanera pillugu ilinniartinnissaat. Ilisimatusarfiup suliaqarluni isumasioqatigiinnerup ingerlanneqarnissaa aggustip qiteqqunnerani aallartinniarpaa, taannalu aggustip naalernerani naammassineqassasoq naatsorsuutigineqarpoq.
University of Cambridge	Kujalleq kommune	15.07 – 31.07.2025	Hollandimi ilisimatusarfik, Utrecht Universitet, suleqatigalugu Cambridge Universitet-ip saffiugassat pisariaqartinneqarlutik pingaaruteqartut pilertarnerat misissorniarpaa. Ilisimatuut nunaqarfiup Igalikup eqqaani ornigulluni ingerlatassanik suliaqarniarput. Tassani taakkua ujarassiornikkut ornigulluni misissuinernik aamma misissugassanik katersinermik juulip

			qiteqqunneraniit suliaqassapput. Ornigulluni suliaqarneq 2025-mi juulip naalernerani naammassissasoq naatsorsuutigineqarpoq.
University of Leeds	Kommuneqarfik Sermersooq	15.07 – 31.08.2025	Ornigulluni ingerlatassatut pilersaarutigineqartut Tunumi Jameson Land-imi ingerlanneqassapput. Ujaqqat Atlantikup ammariartulernerani aammalu Norge-p Tunumiit ukiut 215 milliardinit amerlanerusut matuma siorna nunavissuarmut Pangæa-mut atasimasumiit, avissaarnerani, inissisimaqqaarfiiniittut, Tuluit ilisimatuut misissorniarpaat. Ornigulluni sulineq juulip qiteqqunnerani aallartinneqarpoq aammalu 2025-mi aggustip naalernerani naammassineqarnissaa naatsorsuutigineqarluni.
University of Geneva	Kommuneqarfik Sermersooq	19.07 – 31.08.2025	Ornigulluni ingerlatassani ilaatinneqarpoq piffissanit assigiinngitsunit gnejs-inik aammalu kinnernik katersinissaq, nunarsuup siusinnerpaami qaavata katitigaanerata

			aalajangiunnissaa siunertarineqarluni. Ornigulluni suliaqarneq Quersuup eqqaani, Nuup qanitaani qeqertani ingerlanneqassaaq, aammalu 2025-mi aggustip naanerani naammassissasoq naatsorsuutigineqarluni.
University of Tokyo	Kommuneqarfik Sermersooq	04.08 – 31.08.2025	Ornigulluni suliaqarnerit Isuani ingerlanneqarput. Ingerlatassanut siunertaavoq nunarsuup siusinnerusukkut oqaluttuarisaanera pillugu annertunerusunik ilisimasaqalernissaq, ilanngullugit nunarsuup ilorpiaa, nunavittat, silaannarsuaq, imartat aammalu nunarsuarmi siusinnerpaami uumassusillit. Tokyo Universitet-ip ilisimatuut sisamat ornigulluni suleqatigiittussat sumiiffimmukartinnissaat kissaatigaa aammalu ilisimatuussutsikkut misissuineq aggustip aallartinnerani aallartissaaq. Ornigulluni ingerlatassani ilisimatuut sisamat

			peqataassapput aammalu 2025-mi aggustip naalernerani naammassissasut naatsorsuutigineqarluni.
University of Oslo	Kommune Kujalleq	10.07 – 31.07.2025	Ilisimatuussutsikkut suliniut nunap sannaanut nunap assiliormik aammalu ataasiakkaanik misissugassanik tiguisarnermik 2025-mi juunip qiteqqunnerani aallartinneqarpoq. Ornigulluni sulineq Kalaallit Nunaata kujataani Gardar eqqaani pisuinnarluni ingerlanneqarpoq aammalu 2025-mi juulip naalernerani naammassineqassasoq naatsorsuutigineqarluni.
University of St. Andrews	Kommune Kujalleq	15.07 – 31.08.2025	Ujarassiuutut ilinniartut sisamat Kommune Kujallermi Qaqortup eqqaani nunap sannaanik nunap assiliormikkut nunarsuup qaavata nikikkiartorsimanera misissorniarpaat. Ornigulluni suliaqarnerit 2025-mi juulip qiteqqunneraniit aggustip qiteqqunneranut pisuinnarluni ingerlanneqassapput.

Kalaallit Nunaanni ingerlatassanut ilisimatuussitsikkut aatsitassanut attuumassuteqartunut takussutissiaq.

Nunami aatsitassarsiorluni misissuinerit suliaqarnerit pillugit paasissutissanut tunngaviusut

Nunami assigiinngitsorpassuartigut misissuinerit ingerlanneqarput. Taakkua tassaasinnaapput nunap iluani misissugassanik aalajangersimasunik tigusinerit, nunap sananeqaataanik misissuinerit assigisaallu. Ingerlatassanut assigiinngitsunut maleruagassat assigiinngitsuupput.



Assimi qillerummit qaqitat qillerummit qaqitanut karsiniittut takutinneqarput.

Asimi ingerlatat suussusaat

Teknikkinut Nakkutilliinermullu Immikkoortorta qarfiup matuma siulianiittunut nangissutigalugu paasissutissiissutigisinnaavaa, Teknikkinut Nakkutilliinermullu Immikkoortorta qarfik sioqqutsisumik sukumiisunut akuersissuteqartinnagu, pisinnaatitsisummik pigisaqartut ingerlatassaat makkua suliarisinnaagaat:

- Nunap sannaanik aamma nunap qanoq sananeqaateqarneranik misissuinerit kiisalu laboratoriami misissuinissat siunertaralugit atortut tigummiaannartakkat atorlugit misissugassanik tigusisarnerit, misissugassat sumiiffimmit ataatsimeersut:
 - aatsitassarsiorluni misissuinissamut akuersissutitut 3 tonsinit annertunerunngippata aamma aatsitassarsiorluni misissuinissamut akuersissutitut misissugassat ataatsimut katillugu oqimaassusaat ukiumut 10 tonsinit oqimaannerunngippata.

- Atortut tigummiaannartakkat atorlugit qillerinerit.
- Qaartiterinermut atortussanik atuinani nunap qanoq pinngoriartuaarsimaneranik misissuinerit (qaartiterutissat aamma kukutsissutit).

Taamaattoq ingerlatassat sukumiisortaasa akuersissuteqarfigineqartariaqannginnerannik nalilersuisinnaanissamut, ingerlatassat pisuni tamaginni Aatsitassanut oqartussamut, Teknikkinut Nakkutilliinermullu Immikkoortortaqaqfiup ilaaffigisaanut, nassiunneqartartussaapput.

Ingerlatat allat tamarmik, ingerlatanit matuma siuliani taaneqartunit allaanerusut Teknikkinut Nakkutilliinermullu Immikkoortortaqaqfimmit akuersissuteqarfigineqassapput, ilanngullugit:

- Qaartiterutissanik atuinissaq
- Qillerinerit, atortut tigummiaannartakkat atorlugit qillerinerit ilaatinngit
- Misissugassanik tigusinissaq, matuma siuliani annertussutsinit taaneqartunit annertunerusut
- Qinnqornernit ulorianartunik atortoqartunik misissuineri atortussanik atuinissaq
- Qamutiniq motoorilinnik, entreprenørit atortuiniq assigisaannillu atuinissaq.
- Nunami nalimmassaanerit (assersuutigalugu mittarfiit, sulineri aqutaagallartussat) kiisalu suliffinnik aalaakkaasunik, ikkussukkanik, illunik assigisaannillu sanaartornerit.
- Sulluliornerit, qarusuliornerit, majorallattarfiliornerit il.il.

Allattukkat tamakkiisuunngillat aammalu pingaarnersiuilluni aamma tulleriissaagaanatik.

Akuersissuteqarnernut tunngavissat ilaattut, pisinnaatitsissummik pigisaqartoq ingerlatassatut pilersaarutigineqartunut avatangiisinut sunniutaasussanik nalilersuineri suliaqassasoq, Teknikkinut Nakkutilliinermullu Immikkoortortaqaqfiup/Aatsitassanik Suliassaqaqfinnut Avatangiisinut Aqutsisoqaqfiup piumasaqaatigisinnaavaa. Avatangiisinut sunniutaasussanik nalilersuineq taanna, najoqqutassani pisinnaatitsissummik pigisaqartup ingerlatassat akuersissuteqarfigineqarnissaat siunertaralugu, Teknikkinut Nakkutilliinermullu Immikkoortortaqaqfimmut nassiussassaannut, ilaatinneqartussaassaaq. Aalajangersakkami tassani ingerlatassat immikkut annertuumik avatangiisinut sunniuteqarsinnaasutut ilimagineqartut, assersuutigalugu suussusaat, sumiiffiat aammalu piffissaq suliarineqaqfissaat pissutigalugu, siunnerfigineqarput.

Teknikkinut Nakkutilliinermullu Immikkoortorta qarfimmi oqartussaasutut suliarinninnermi, ilanngullugit akuersissuteqarnerit, pisinnaatitsissummik pigisaqartut akuersissuteqarnernik imaluunniit akuersissutinik, inatsisit aatsitassanut inatsimmit allaanerusut malillugit pisariaqartunik, pinianginnissaat akuerineqanngilaq.

Asimi suliaqarnermut maleruagassat

Asimi suliaqarnek makkua mianeralugit ingerlanneqartassasoq, nalinginnaasumik maleruagassatut atuuppoq:

- Suliaqarnek isumannaallisaanikkut isumannaatsumik aammalu pissutsit aalajangersimasut eqqarsaatigalugit ingerlanneqartassaaq
- Uumasut pisariaqanngitsumik akornusersorneqassanngillat
- Nunap qaava aamma naasoqarnek pisariaqanngitsumik ajoquserneqassanngillat. Sumiiffimmi naasoqartuni misissugassanik tigusernermi taamaalilluni issoq misissugassanik tigusiiffimmit piiarneqassaaq, aammalu misissugassanik tiguseriitsiarnermi putuliamut utertillugu inisseqqinneqassalluni
- Avatangiisinik mingutsitsisinnaanerp allatullu ajoqusiisumik sunniisinnaanerp aarlerinaateqarnera sapinngisamik annertunerpaamik killilersimaarneqassaaq
- Sulineq inunnut imaluunniit inuit allat piinik navianartorsiortitseqqusaanngilaq
- Allat aallaaniarnerat, aalisarnerat imaluunniit allatut suliaqarnerat pisariaqanngitsumik akornuserneqassanngilaq imaluunniit ajornakusoornerulersinneqassanani
- Itsarnitsat, uuttortaanermi aallaaviusartut kiisalu uuttortaasarfiit allallu sanaartukkat ajoquserneqassanngillat.

Asimi maleruagassani allatigut qulequttat makkua maleruagassiivigineqarput:

- Timmisartorneq, biilerneq aamma imaatigut ingerlaarneq
- Itsarnitsat, itsarnisarsiornermit nassaarineqartut il.il.
- Nalunaarasuartaateqarnek
- Ikummatissat, asimi ikummatissaasiviit
- Asimi tammaarsimaarfik, ilanngullugit eqqagassalerineq, kiisalu saliisarneq
- Upalungaarsimaneq
- Sumiiffiit uumasunut pingaaruteqartut, kiisalu sumiiffiit eqqissisimatitaasut
- Qillerummit qaqitassanik qillerineq allatullu qillerinernik suliaqarnek

- Qamutiniq motorilinnik ingerlaarneq
- Qaartiterutissanik eqqussineq, assartuussineq, uninngasuuteqarneq aamma atuineq
- Teknikkinut Nakkutilliinermullu Immikkoortortaqarfimmut nalunaarusiortarneq.

2025-mut asimi pisussanut pilersaarummut nalinginnaasumik apeqqutissaqaraanni imaluunniit oqaaseqaatissaqaraanni Teknikkinut Nakkutilliinermullu Immikkoortortaqarfimmut saaffiginnittoqarsinnaavoq uunga mlsa@nanoq.gl imaluunniit oqarasuaat +299 34 68 00.

Attaveqarfissanut paasissutissat

Kalaallit Nunaanni nunap iluani aatsitassat, asimi suliaqarnermut maleruagassat, ingerlatassanut akuersissuteqarnerit, pisinnaatitsissutit kiisalu ingerlatseqatigiiffiit aatsitassarsiorluni misissuinerмик piiaanermillu ingerlatsisut, Kalaallit Nunaanni suliaqartut, pillugit apeqqutissaqarnermi inussiarnersumik attavigineqassaaq:

5.1 Teknikkinut Nakkutilliinermullu Immikkoortortaqarfik

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik

Imaneq 1A (Nuukcenter)

Postboks 930

3900 Nuuk

mlsa@nanoq.gl

www.govmin.gl

(+299) 34 68 00

joeh@nanoq.gl

(+)299 346846

5.2 EAMRA

Imaneq 4 (illu aappaluttoq)

Postboks 909

3900 Nuuk

eamra@nanoq.gl

<https://eamra.gl>

(+299) 34 50 00

5.3 Pinngortitamut Avatangiisinullu Naalakkersuisoqarfik

Imaneq 1

Postboks 1015

3900 Nuuk

https://naalakkersuisut.gl/Departementer/Natur_og_Miljoe/Hjemmesider?sc_lang=da

pan@nanoq.gl

(+299) 35 50 00

5.4 Pinngortitaleriffik (GN)

Kivioq 2

Postboks 570

3900 Nuuk

<https://natur.gl>

info@natur.gl

(+299) 36 12 00

5.5 De Nationale Geologiske Undersøgelser for Danmark og Grønland (GEUS)

GEUS Nuuk

c/o Pinngortitaleriffik

Postboks 570

399 Nuuk

<https://www.geus.dk>

geus@geus.gl

(+299) 36 12 62

5.6 Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik

Imaneq 1A 701 (Nuukcenter)

Postboks 269

3900 Nuuk

(+299) 34 50 00

https://naalakkersuisut.gl/Departementer/Fiskeri_Fangst_Landbrug_Selvforsyning?sc_lang=da

Apn@nanoq.gl

5.7 Nunatta Katersugaasivia Allagaateqarfialu

Hans Egedesvej 8

Postboks 145

3900 Nuuk

www.nka.gl

nka@natmus.gl

(+299) 32 26 11

5.8 Avannaata Kommunia

www.avannaata.gl

avanannaata@avannaata.gl

Sumiiffinnut kommunip aggornerisa avataaniittunut inussiarnersumik Arktisk Kommando aamma Kalaallit Nunaanni Politiit attavigineqassapput

5.9 Arktisk Kommando

Aalisartut Aqqutta 47

3900 Nuuk

www.forsvaret.dk

ako@mil.dk

(+299) 36 40 00

5.10 Kalaallit Nunaanni Politiit

Imaneq 22

Postboks 1006

3900 Nuuk

www.politi.gl

grl-politi@politi.dk

5.11 Kommune Qeqertalik

www.qeqertalik.gl

qeqertalike@qertalik.gl

5.12 Qeqqata Kommunua

www.qeqqata.gl

qeqqata@qeqqata.gl

5.13 Kommuneqarfik Sermersooq

www.sermersooq.gl

kommuneqarfik@sermersooq.gl

5.14 Kommune Kujalleq

www.kujalleq.gl

kommune@kujalleq.gl

Appendix 1: Kalaallit Nunaanni kommunit killeqarfii

Ingerlatseqatigiiffinnut aatsitassarsiorlutik misissuisartunut piiaanermillu suliaqartunut ingerlatsisunut attaveqarfissat allassimaffiat

Ingerlatseqatigiiffiit aatsitassarsiorlutik misissuineramik piiaanermillu ingerlatsisut, Kalaallit Nunaanni suliaqartut, Teknikkinut Nakkutilliinermullu Immikkoortorta qarfimmu toqqaannartumik saaffiginninnikkut attavigineqarsinnaapput. Allattuiffik ingerlaavartumik nutarterneqartartoq Teknikkinut Nakkutilliinermullu Immikkoortorta qarfiup nittartagaani takuneqarsinnaavoq <https://portal.govmin.gl/owner>